



# MARYMA

Ramhlun North YMA Chanchinbu

“YMA thuvawn: YMA chu tanpui ngaite tanpuitu”



YMA thiltum: 1. Hunawl hman that. 2. Zofate hmasawna ngaihtuah. 3. Kristian nun dan tha ngaihsan

Vol. 44

Issue No. 18

Ramhlun North: Ni 1 May, 2026



## BRANCH THU

■ May ni 8, 2026 (Zirtawpni) zan dar 7:00 hian YMA Committee Room-ah Ramhlun North Branch YMA Executive Committee meeting koh a ni dawn a, member ten ngai pawimawh a hun remchang lo insiam nise.

■ May thla khawharin hruaitu turte:  
Leader : Pu Malsawmzuala Ralte  
Asst Leader : Pu R. Lalrinliana  
OB Incharge: Dr. Joseph Lalhmingliana

1. Pu Pu Vanlalruata Ralte
2. Tv. Lalthanchhunga
3. Pu Pu Lalramdina Sailo
4. Pu Richard Saingura Sailo
5. Tv. Joseph Lalrinawma
5. Ni. Lalmuanpuii
6. Ni. RL Chungnungi



## SUB-COMMITTEE THU

■ **Music sub-committee:** Ni 30.04.2026 (Ningani) zan khawhar in ban khan Music sub-committee member-ten sound system enfel leh a tha lo te siamin an hnaltang.

■ **Library sub-committee:** Ni 1.5.2026 (Zirtawpni) khan Mamma Mia Resort, Hualngo Hmun ah Training cum retreat an nei a, he hunah hian resource person atan Dr. Jacob MS Dawngliana, Gen. Secretary, Mizoram Library Association chu sawm a ni.

Intuaitharnaah hian Library sub-committee member mi 30 vel an kal thei.

■ **April thla chung a Library kal kim te:**

1. Lalrinsangi Ralte. C-Sec.
2. Lalnunhlui Ralte. C-Sec.
3. Laldusaki Ralte. C-Sec.
4. Isak Malsawmtluanga. C-Sec.
5. Phoebe Lallawmsangi. S-Sec.

■ **Library duty turte:**

1. Samuel Vanlalnghaka, N-Sec.
2. PC Lalrindiki, V-Sec.
3. Lalfelfamkimi, V-Sec.
4. Lalmuanpuii, C-Sec.
5. Lalremruatkimi, K-Sec.
6. Lalhruaithuangi, T-Sec.

## HSSLC RESULT A CHHUAK

**Ramhlun North, the 1<sup>st</sup> May, 2026:** Mizoram Board of School Education (MBSE) chuan ni 29.04.2026 (Nilaini) chhun dar 12:00 khan Higher Secondary School Leaving Certificate (HSSLC) Examination, 2026 result a tichhuak a, zirlai 12,243 zinga 10,734 an pass a. Pass percentage hi 87.67 niin nikum (81.10%) aiin zaa 6.57% in a sang zawk.

HSSLC result chhuakah hian Arts stream-ah exam beitu 8,714 awmin zirlai 7,575 an pass a, Science stream-ah exam beitu 2,770 awmin zirlai 2,472 an pass a, Commerce stream-ah exam beitu 759 awmin zirlai 687 an pass.

Tun tum HSSLC result chhuakah hian candidate zawng zawng pass vekna; Arts-ah school 64 an awm a, Science-ah 14 awmin Commerce ah 16 an awm. Hetih lai hian candidate zawng zawng fail vekna Arts-ah pakhat awmin Science leh Commerce-ah an awm lo thung. District malah Arts-ah Serchhip district pass percentage a sang ber a, zaa 91.86 a ni a, Science-ah Kolasib district niin zaa 94.59 an pass a, Commerce-ah Hnahthial district niin zaa 100 an pass a ni. Compartment ah 115 an awm bawk a ni.

Kan veng chung a zirna in pahnih, St. Joseph Higher Secondary School leh St. Stephen's School ten kumin exam-ah result duhawm tak an nei thei hi thil lawmawm tak leh chhuanawm tak a ni. Zirna kawngah kan veng min tihmingtha a, naupangte thawhrimna leh zirtirtute thahnemngaihna rah chhuah a ni tih a hriat hle mai. School pahnihte dinhmun chu hetiang a ni:

School	Stream	Appeared	Pass	Percentage
St. Joseph HSS	Arts	195	190	97.4
	Science	205	203	99.02
	Commerce	65	65	100
St. Stephen's School	Arts	26	26	100
	Science	20	18	90

### LAWMPUINA LEH DUHSAKNA

Aizawl North-II (ST) Assembly Constituency huam chung a HSSLC pass thar zawng zawng te ka lawmpui tak zet che u.

Hlawhtlinna chang ve ta lote pawh beidawng mai lo a, hlawhtlinna chang ngei tura theih tawp chhuah zel turin duhsakna ka hlan a che u.

Dr. VANLALTHLANA  
MLA, AIZAWL NORTH II

## CADS 2<sup>nd</sup> BATCH PUIPA LEH MEMBER LA LUT

Central YMA hnuai a ruihhlo do tura din, Central Anti Drugs Squad (CADS) 2nd Batch, 2026 puipa leh member turte, April ni 27, 2026 (Thawhtanni) chawhnu dar 3:00 khan lakluhna hun hman a ni.

Tuikhuahlanga Central YMA Hall-a lak luhna inkhawm hi Central YMA Vice President Prof. Lalnunluanga'n a kaihrui a, Lalhmuchhuaka, CEC-in hunserh a hmang. Prof. Malsawmliana, Gen. Secretary-in CADS member-te inhmelhriatna hun a hmang.

Inkhawmah hian Central YMA President R. Lalngeta chuan thu sawiin, CADS member-ten ruihhlo do kawngah fimkhur a tul a, thlemna a nasa a, rilru fim tak leh puitling taka an chet a ngai a, tihsual palh a awm pawhin ngaihdam dil hreh loh tur a ni a. Taimak chhuah leh teirei peih a tul a, tlawmngaihna nen ruihhlo an do a tul a. Inlungualna leh thawhhona tha a pawimawh tiin CADS member-ten a chah.

CADS 2nd Batch, 2026-ah hian CADS puipa (Office Bearers) atan Convener : SF David Ngursangzuala, Asst. Secretary, Central YMA; Asst. Convener: RL Zomawia, CEC leh R Lalchhandama, CEC; Secretary: Darremsanga Renthle, CEC leh Asst. Secretary: Anthony Lalhriatpua, CEC te ruat an ni a. Anni bakah hian member 18 an awm a ni.

Central YMA Kumpuan Sub-Committee member-ten chu a hranpaa CADS member-ten ruat ngai lo in tel sa vek tura ngaih an ni a. CADS member thar ruatte hian tlawmngaihna rilru nen an mawhpurhna hlen chhuak ngei turin Central YMA chuan a beisei a ni. CADS 2nd Batch, 2026 term hi April 27, 2026 atanga July 26, 2026 thlang a ni ang.



## BEISEINA THARNEN

*Tun hnai ah MBSE chuan HSLC leh HSSLC result a ti chhuak a, hlawhtlinna hmu thar, Class 10 leh 12 pass-te kan lawmpui em em a, in thawhrinna leh in kum khat hna thawh rah in seng hi in tan hlawhtlinna kawng pawimawh tak a ni. Mahse, he hlawhtlinna hi a bul tanna chauh a ni a, khawvel inelna sang zawk hmachhawn turin inbuatsaih tanna a ni tih hre tel ila. Result tha tak neih hi a hlu a, hlawhtling tak tak tur chuan nungchang tha, rinawmna, leh thahnemngaihna nen a zir chhunzawm zel a ngai a, zirna sang zawkah pawh inthlahdah lova tan lak chhunzawm zel a pawimawh ang.*

*Chutih rualin, tun tuma hlawhtlinna chang rihlote erawh beidawng lo turin leh tang zual sauh turin kan in fuih bawh a ni. Exam pakhat hlawhchhamna hian kan hlutna a tihniam lo va, kan hma hun a tih tawp pah hek lo. Khawvela mi hlawhtling tam takte hi vawi tam tak hlawhchham tawh, mahse beidawng lova bei fanfante an ni tlangpui. Hlawhchhamna hi tlukna a ni lo va, kan hma lama chak zawka ke kan pen leh nana zirlai pawimawh tak a ni zawk tih kan hriat thar a pawimawh. Kan tlukna hmun hi kan thawhleyna tur hmun a ni a, kan thawhleyna huna kan ke pen leh tur chu a hma aini a nget zawk tawh ngei ang.*

*Nu leh pate mawhpurhna pawh a sang hle. Kan fate hi kan tana an hlutna hi an mark hmuhah chauh a inngat tur a ni lo. Naupang tam tak hian an beidawngna aini an nu leh pate an tihlungngaih avanga hrehawm tihna an nei nasa zawk thin. Chuvangin, chakna nei thar leh tur chuan fuihna leh hmangaihna aw kan chhuah a pawimawh hle.*

*Zirna hi intihsiakna a nih rualin, nun hrim hrim hi chu beidawng lova beih fan fan na a ni zawk. Hlawhtlinna changte pawhin hlawhtlinna tuantling nei turin kan beih tauh tauh a ngai a. Hlawhtling rihlote te pawhin tuna kan hlawhchhamna hi thawhleyna hmanruaah hmang thiam ila, khawvel hi bei fan fan tute tan chuan hlawhtlinna hmun a ni si a.*



## KHAWTHLIR

## HMANLAI MIZOTE KUANG UR DAN

Kuanga inur hi thil namai lo tak, tha tam tak sen ngai leh tlangval leh khawtlang tihbuai ngai thil a nih avangin chhungkhat laina ngah deuh leh pa nei zo deuh tan pawh tih mai mai chi a ni lo va. Lal chauh lo chuan an ti mai mai ngai lo a ni. Kuang an urna chhan ber chu thih hnua inphum bo mai lova, a ruh chi kim la kawh that reng an duh vang a ni ber a. Tin, tlang dang danga pem kual reng an nih avangin, chutia an mi ui em em, tlang danga an pemsan huna rampa lailenga lo awm tir ngawt mai chu fel tawh lova an hriat vang leh, an ruh an kawh chuan anmahni la kawh ang deuha an inngaih vang a ni ber.

Lalte hi kuangin an inur ber a, an thih veleh tlangval thahnem tham tak ramhnuaiah an kal a. Thing lian tawh tak an kit a, feet riat vela seini leh lam leh lamah an tan bung leh a. Chu thing chu a lai takah an ek phel phawk a; a phel leh lam ve ve chu han belhbawm leh pawha mitthi ruang leng han han tur khawpa zauvin an kher tawn vak mai a. Chu chu, mi tam fein an zawn hawng a, tichuan mitthi ruang chu a chhungah an dah ta thin a ni. Chutia ruang an dah fel hnu chuan, chu thing chu an phuar pum leh a, a rim chhe chhuah mai mai theih lohna turin a keh leh a awng lai a piangah vutsawhin an zut phui tlat a. Tin, a tui luan chhuahna turin a hnuai lamah hmun khat an rek pawp leh a. Chu an reh pawhah chuan mau dawt an vuah a, chu mau dawt chu lei chhungah an phum tlat a. A rim a chhuah theih loh nan a hu chhuahna tur apiang chu an zut phui leh vek thin a ni. Chu kuang ur nan chuan in chhungah a hranpa ngatin tap an chhep bawh a, dan naranin pathlang lamah an chhep deuh ber thin. Chu tap sirah chuan kuang chu an mut zuah mai a.

Tichuan chuta thing tuah tur chu tlangvalin thing lian pui pui an pu khawm teuh a, tap bulah chuan tuah mai theih turin an keuh vum thur mai a. Zankhuah chatlak hlek lo va, kuang chu ur lum reng tur leh thing tuah reng turin kuang bulah chuan tlangvalho chu an inriah chhawk tlut tlut reng a. Zan laiah pawh mei chu mit miah lo va, chhawm nun reng a ngai a ni. Chutiang tih peih chu mi taima tak hna a nih avangin an inelna ber pakhat a ni. Chhun lamah erawh chuan tlangvalte chu hnathawh a tul a, pahovin mei an lo vil ve thung thin. A chhungte khan kuang riahchilhtute leh chhuna vil tute kha zuin an hrai reng bawh a, an insengso nasa hle thin. Kuang vil tute tan lah chuan zan laia kuang bula mei tuah tura han thut chhuah vang mai lah chu, tleirawl deuhte tan pheh chuan a nuam

lo hle bawh si a, chuvangin duat an tul ve hle bawh a, tih sak awm reng pawh a ni.

Mihring tisa hi a lo inang lo hle mai a, thenkhat chu a tawih awl a, thenkhat erawh chu thla khat lai ur pawhin an la tawih ral lo hle mai thung a; kuang ur chung a inang thei meuh lo. Dan naranin thla khat emaw, thla hnih emaw chhung a awh thin avangin tlangvalte an rim tawngkhawng thei hle. A kar lakah khan, kuang chu hawngin a tawih ral tawh leh tawh loh an en chhin bawh a, a tawih ral har lutuk turte chu an hlep sawm deuh nuai bawh thin. A lo tawih loh lutuk chuan a ngai ang thlapin an chhin tha leh a, an ur nawn leh mai a ni.

Kuang hawn hi thil huphurhawm tak mai a ni a. Kuang hawng tur chu laina bul tak tak, pasaltha leh tawmngai fawr deuh tak nih a ngai reng a ni. An hawn hmain zu an han tulh rui zet phawt a, an phur ta hle maw tihin kuang chu an hawntir ta thin a. A rim a chhe em em a, a ruh la tawih filh lote chu tlahti/mau hriam tawh taka zai thlak chawp la ngaite a awm ziah a, han deh vel a hrehawm em em mai a ni. Mahse ten awm takin an awm ngai reng reng lo va, chak zawk ni awm takin hlim hmel pusarh chungin tihfai ngai zawng zawng chu an zut fai kelh mai thin. Tichuan mitthi ruh chu, tui lumin an sil fai a, an pho ro diam a. Engmah chhe thei tur a awm tawh loh hnuah chuan a chhungte'n an ruh chi kim chu puanin an fun tha a, thulah tha takin an kawh ta thin a ni. Chutianga ruh an kawlte chu anmahni la kawh ang deuhah an inngaih avangin an roh em em mai a, tihchhiat emaw, phum bo emaw, paih bo emaw an phal mai tawh ngai lo. Kuang hawn tuk hian khawchhung chu rim chhiain a khat a, chaw ei thei pawh an awm ngai lo a ni tih a ni thin.

Hmanlai chuan Sailo lalte hi chu an thihin phum ve mai an ni ngai lo va, kuangah an inur zet a, an luruh leh an sam te chu puanin an tuam a, thul chhungah tha takin an khung a, tui-um hunna kiang tui chhuarah an hung thin a ni. Mimkut thla a lo thlen apiangin an phawr chhuak kum tin a, sahriak te an thih thin a ni. Chung ruhrote chu an chhungte thi hnuhnung ber ruhro dang phum rual khan an phum ve chauh thin a ni.

Lallianvunga thlahte erawh kha chuan, an pian tlem em avangin Pathianin min khawngaih ang a, kan piang ve deuh mahna tih beisein an inphum bo ve mai phal lo va, an kawh khawm reng thin a. Amaherawhchu, Khanpui chhuahsana Kelzam an chhuk dawn khan Lalhleia chuan, "Kan rethei ta em mai, mitthi kawh tlak pawh kan ni ta lo ve," a ti a, an thlahtute luruh ro an la kawh zawng zawngte chu, Ratu lal Lalhleia chuan 1890 kum khan, Khanpui khaah a phum ta vek a ni.

**Editor:** Vanengmawia (7085878827); **Jt. Editors:** A. Lalfakzuala, Lalrotluangi Zote, Henry VL Nghilhlova Zote

**Manager:** Lalremsanga Hnamte (8974845644); **Asst. Managers:** Zodingliana, Lalrinchhana, Lalrinawma

**News Editors:** Lalrintluanga, Lalrawntluanga, Andrew Lalmalsawma, Samuel R. Lalmangaiha, D. Lianmanga, Vanalremruatpuia Ralte

**Circulation Managers:** PB Lalhuapzauva, Samuel Lalhlupua, Hmingthanzuala, Vanlalrinkima, R. Zodinsanga, Zothankhuma, Lalrinchhana, K. Lalmuanpuia

### ZIN & HAW

- Dr. Joseph Lalhmingliana, Branch Asst. Secretary chu chhungkaw pawimawhah Delhi-ah a zin.
- Vanlalhlamuanpuii (Maryma Agent) d/o H. Rodingliana, BECM chu chhungkaw thilah Champhai ah a zin.
- Er. R. Lalthakima, T-Sec. chu New Delhi Max Hospital-ah in check-up turin a kal a, a fapa Er. Zosangliana Ralte in a kalpui.
- Pu Lalbiaktluanga leh Pi Lalchhuanmawii te nupa, V-Sec. te chu chhiattawhna avangin Ngopa ah an zin.
- Pi A. Zamawii w/o K. Lalbiakmawia, S-Sec. chu chhiattawhna thilah Ngopa ah a zin.
- Pro. Pastor David Lalnunpuia, N-Sec. chu Presbyterian Church of India, Assembly hmangin Shillong-ah a zin.
- Rev B. Sangthanga, C-Sec. chu Presbyterian Church of India Assembly hmangin Meghalaya-ah a zin.
- Pu K. Romawia, V-Sec. chu Indian Spinal Injury Centre, Delhi-ah in check-up turin a kal.
- Pu Lalremsiama Khiangte, K-Sec. CKTP programme a Chhingchhip a zin chu a lo haw leh ta.
- Pu Lalchangliana, N-Sec. chu Presbyterian Church of India, Assembly chhimin Shillong-ah a zin.

### LAWMAWM

- Lalmuanpuia Zote s/o Vanlalnghaka Zote (L), T-Sec. leh Rebecca Vanlalrochampanui d/o Paul Zonunpara (Fam), C-Sec. te chu May ni 1, 2026 khan Ramhlun North Presbyterian Kohhran Hall-ah an innei.
- Lalthazuali d/o Lalramlawma (Fam), C-Sec. leh H. Lalhruaizela, Republic Vengthlang te chu April ni 30.4.2026 khan BCM Republic Vengthlang Kohhran Hall-ah an innei.
- Pu Liankima leh Pi Lalrempuii Jongte, T-Sec. te chuan ni 23.04.2026 khan Synod Hospital, Durtlang ah fapa an nei.

### PAWL DANG

- **Mizoram Consumer Union, Ramhlun North Branch:** Mizoram Consumers' Union, Ramhlun North Branch te chuan ni 8.5.2026 (Zirtawpni) zan dar 7:00 hian MHIP Run, Ramhlun North ah hruaitu thar an thlang dawn a. Veng mipui a tam thei ang ber kal turin min sawm a ni.
- **Ramhlun North Football Club:** Ramhlun North Football Club chuan ni 2.5.2026 (Inrinni) dar 11:00 AM khan RSC Field-ah Academy hawna hun an hmang.

### LEI PIAH LAMAH

**Lalawmpuia, K-42** s/o Lalrawna, T-Sec. chu ni 28.04.2026 dar 10:30 AM khan a boral a, a ruang hi lumen niin a tuk ni 29.04.2026 chhun dar 12:00 ah Ramhlun North Thlanmual, Zemabawk ah vuiliam a ni.



**Vanlalthuama, K-35** s/o Tuikhuahtanga, N-Sec. chu ni 30.04.2026 dar 2:00 PM khan a boral a, a ruang hi lumen niin a tuk ni 01.05.2026 chhun dar 12:00 ah Ramhlun North Thlanmual, Zemabawk ah vuiliam a ni.



**Lalhluhchungi, K-84** w/o Lalthazuala, S-Sec. chu ni 02.05.2026 dar 6:50 AM khan a boral a, hemi ni vek dar 1:00 PM ah Ramhlun North Thlanmual, Zemabawk ah vuiliam a ni.



Lusun khawhar chhungte thlamuante Pathianin vengin awmpui zel che u rawh se.

### DAMLO

- Pi Councilthangi w/o Hmuakliana, N-Sec. chu natna hrang hrang avangin Greenwood Hospital-ah enkawl mek a ni.
- Pu Saidinga Sailo, T-Sec. chu Synod Hospital, Durtlang ah enkawl mek a ni.
- Pu Lalrawna, V-Sec. chu Synod Hospital, Durtlang ah zun thlum leh kal thalo avangin enkawl mek a ni.
- Pu Ramdinzaiva, T-Sec. chu Typhoid leh Scrub Typhus avangin in lamah enkawl mek a ni.
- Matthew Lalruatdika s/o Rosangpuii, C-Sec. khawsik leh awmna avanga Synod Hospital, Durtlang a awm chu a lo chhuak leh ta.
- Grace Rindiki Ralte d/o Joseph Laldusaka, N-Sec. chu hritlang awmna avangin Synod Hospital, Durtlang ah enkawl mek a ni.
- Pu Lalrinzuala, T-Sec. chu Ebenezer Hospital-ah enkawl mek a ni.

### THILDANG

- **Ruang chhuak:**
  1. J. Lalparmawia, K-82 chu ni 27.04.2026 dar 11:00 AM khan Synod Hospital, Durtlang ah a boral a. A ruang hi Pu Lalrothara, C-Sec. ten la in damdawin atangin an khua Sesawng panpui nghal a ni.
  2. Zoramthanga, K-44 chu ni 1.05.2026 dar 2:50 PM khan Civil Hospital, Aizawl ah a boral a. A ruang hi Pu B. Roenga, C-Sec. ten la in damdawin atangin an khua Kawlkuh panpui nghal a ni.

### LOCAL COUNCIL

■ Garage dilna form la tur ten garage an neihna hmun House no., YMA Section, Phone no. te chiang taka ziakin Local Council a pek turin ken thin tur a ni. Mi garage a dah tur pawhin a garage neitute remtihna ziakin ken tur a ni.

Tin, Local Council a lehkha la tur ten Pathianni (Sunday) ah chuan la lo thei ila a lawmawm hle ang.

■ **PPP Mode Sanitation Committee thu:** Main road a bawlhhlawh paih motor dar 9:30 AM a kal thin chu Ni 04.05.2026 (Thawhtanni) atangin dar 10:30 AM ah point hmasa ber Bawngkawn South nena kan inrina atangin a kal tawh dawn a, AMC road-ah Sanitation Point, Pi Thangluri kawmchhakak pakhat dah belh a ni.

### KOHRAN

■ **Presbyterian Kohhran, Ramhlun East:** Ramhlun East Branch KTP hruaitu mi 20 vel chu May ni 1 (Zirtawpni) khan Dampa Zodin tlawh turin an kal. He hunah hian Dampa Zodin KTP-te leadership training, sound leh music training-te an neihpui ang a, Thawhtanni lah an rawn haw leh ang.

■ **Salvation Army:** Ni 30 April - 2nd May chhung hian Young People (YP) Intermediate leh Senior department naupang pual camping Biak Inah neih a ni a, speaker atan Evan Lalnghakliana, TEM Speaker chu rawih a ni.

Ramhlun CO Bial SAY Half Yearly Meet chu ni 3.5.2026 (Pathianni) Chawhma leh zanh Ramhlun Corps ah neih a ni dawn a, speaker atan Maj. T. Zothanmawia, Divisional Youth Secretary (DYS) chu hman a ni ang.

■ **BCM, Ramhlun North:** May ni 1, 2026 (Zirtawpni) zan khan MTKP Platinum Jubilee lawmna kal meka Mizoram pum huap TKP Group zai intihsiakna neih mek chu BCM Ramhlun North ah Aizawl E/S Area pual bik neih a ni.

May ni 2 (Inrinni) khan BKHP Day vawi 88-na pualin Unit BKHP te pawhin zingkarah vengchhung tifaiin an hnatlang a. Chawhma lamah Inkhawmna neiin chawhnu lamah intihsilimna hun an hmang a ni.

Pathianni zan hian Ramhlun North Kohhran chuan Praise & Worship hun an hmang ang.

■ **Roman Catholic:** CTP, Ramhlun Parish te hian May 2 & 3 hian Inkhawmpui an hmang dawn. May 2, Inrinni nileng khan Rally (Sports & Games) Durtlang ground ah an nei a. May 3, Pathianni ah chhunzawmin chawhma lamah Muanna Vengah Mass inkhawm an nei ang a, Chawhnu ah Fellowship & kumpuan thupui sawina an nei baw ang. Tlai lamah ruai theh in zan lam ah Variety Program leh Rally Champion puanna an nei dawn baw a ni. Zan lam hunah hian Ramhlun Parish atanga Diocese Zaipawl Member thar te puanzar na hun neih tur a ni ang.



ARTICLE

**ADVENTURES OF VALVUAI BRIDERS**

- Jeffrey-a Pa 240420261648

Kum 1850 – 1859 inkâr vel khan Chhim leh Hmar indo laiin in 300 khua-a inchhal Khawnglung khua chu Pawi (Zahau) leh Vuttaia ho te'n an run a, mi thahnem tham tak an thah bakah eng emaw zat salah an man ni a sawi a ni.

Mi tam berin an sawi dan chuan Khawnglung khua-a hi a khaw hmar lama lung pahnih lian angreng tak inkâra kal tlang chauh loh chuan a luh theih loh tih a ni a, heng lung pahnih hi 'Lungdai' tih a ni nghe nghe.

Khawnglung Rûn tia lar ta rawn rûntute hi Lungdaia kal tlang nia ring an awm laiin thenkhatin an khaw chhak lam Tuichang lui êp kham chhengchiaah ar-lei te dawhin an rawn lawn chho niin an sawi bawk.

Hetiang a nih avâng hian eng hawi zawng maha 'historian' ni ve hlei lo hian Khawnglung fan ka chak ta tlat a, keimah ang thova kan ram hmun hmingthang leh khaw la tlawh loh tlawh chak thian kawmngaih ka nei a, a ni nen chuan Khawnglung tlang dung leh hmun hlui hrim hrim han pal darh kan tum ta a.

Khawnglung Wildlife Sanctuary enkawltu (R.O), kan thianpa hnenah kan thil tum kan hrilh a, Pangzawlah ani'n min lo nghak ang a, keini'n kan han pawh ang, tiin kan rel fel ve thlap a.

Aizawl aţângin kan thianpun in kan chhuak a, kawngpui pangngai eng emaw chen kan zawh hnuah ka khaw la tlawh loh Lungmawi khua tlawh ka chak avângin Thenzawl aţângin Zote kawngah kan peng a, Chhipphir khaw tlan pelin Bualpui V khaw tawn tirah Lungmawi panin kan tlan a, Mat lui kanin kan thianpa min lo nghahna Pangzawlah kan chuang chhuak ta hlawl a.

Thingpui kan in zawhin chhimlam aţanga Khawnglung tlang lawn chhuah tumin Tuichang panin kein kan chhuk ta vang vang a, kan lirthei hman erawh chu Rawpui tlangval pakhatin rama kan cham chhunga lo dah that atan an khaw lamah a khalh phei thung. Vanneithlak takin Pathian zarah kea kal hi ka theih ve zawng tak a ni a, chuti chung chuan Pangzawl aţanga chhuk zawnga han kal tan ngawt mai kha ka khupin a tuar lo lek lek thin a, chu chu tlem in buaithlak ka ti deuh.

Darkar thum tha lam kan chhuk thlak ngar ngar hnuin rei vak lo chhung a phei zawngin kawng kân zawh a, kan riah tumna hmun Khawkho lui leh Tuichang infinna bul kan thleng ta hlawl a, chu lai hmun chu Khawkho chhuah an ti.

Tiauphoah kan puan in kan kaih sawk sawk a, Khawkho luiah kan insil thuk thuk a, rawng kan bawl nghal ta mawlh mawlh a, zanriah kan eikham meuh chuan khua a thim dawn ruai tawh. Ramhnuai riak thin chuan in hria ang a, khua a thim tawh chuan han tih vak tur dang a vang hle a, chuvângin zan dar 7:00 a rik meuh chuan kan hnar tluk tluk tawh a nih pawhin tu han dem theih han ni lo ve.

**A ni khatna chu** - Khawvar tirhah kan tho a, rawng kan bawl nghal sawk sawk a. Kan bawl zawhin kan kal tum lohna lam, Khawnglung Wildlife Sanctuary huam chhung tho, Tuichang kam chhak lam (kan riahna ral) Tlangpan-ah Tuichang pum hmanga inkâr kaiin kan han fang thuk thuk a, kan riahna lamah tûkthuan ei turin kan let leh ta a.

Tûkthuan eikhama kan han zik mar zawhin kan tum ber Khawnglung tlanga lawn tur chuan kan kal tan ta a, kan chhuah hian zing dar 8:00 vel chiaha ni. Hmar lam, Khawnglung tlang bul thut aţângin a tlang dung chu chho zawng hlirin kan zawh chho ta ngat ngat a, kan puak phurh a zang lutuk lo hlawn nen kal a sawt mawh hle.

Ngaw chhunga kal hi nuam ka ti viau thin a, mahse mau hmun ngawa kal ngat ngat tluka thil ninawm hi avâng viauin ka hre thung. Mau bul chhuih khut a awl a, mau hnah tla rah palha tlang zuk a awl viau bawk. Kan tlang a, kan tlu a, a lum em erawh kan lum lo hlauh thin.



ADVERTISEMENT

**KC TUI**

Tui thianglim tak PHE a quality test thlap, Pickup-in 2,000 litre kan pe thei reng e. Ramhlun North veng chung tan discount kan pe e.

Ph: 9774223462 / 7005010327 (10-6)

**ST. ANTHONY'S HR. SEC. SCHOOL (3-2)**

Chaltlang Lily Veng, Aizawl.

Kum 2026-2027 session atan Class-XI (Arts) admission kan hawng ta e.

(i) Zirlaite hi Zirtirtu tha leh thiam tak tak ten Pathian thu nen an enkawl thin. Kum tinin HSLC / HSSLC Exam ah Result tha tak kan nei thin.

(ii) Kan zirlaite hi Free Spoken English Class pek thin an ni.

(iii). Hostel nuam leh changtlung tak a awm bawk e.

(iv) Nitin Thawhtanni aţanga Inrinni Inkar, Dar 9:30am - 4:00 pm ah dawr theih kan ni e.

Contact No. 9612131959/ 9862732487/ 8575827857

**PUBLIC HIGHER SECONDARY SCHOOL**

RAMHLUN VENGLAI: AIZAWL (3-2)

Admission Open: From 10 AM - 3PM

For Class XI

Subject Offered: 1. English 2. Mizo 3. Education 4. Economics

5. Political Science 6. History 7. Geography

Ph: 9436782551/ 9862598857



(2-2)

**STAINES' MEMORIAL SCHOOL  
ADMISSION OPEN**

For Academic Session 2026 - 27

**From Class IX - XII**

Available Streams in Higher Secondary :

**ARTS | SCIENCE | COMMERCE**

**Key Features & Facilities :**

- Experienced and dedicated teaching staff
- Modern teaching aids
- Holistic education, discipline & values

**Limited seats available. Apply now !**

Address : Chanmari, Ramhlun Road  
Contact no. : 0389-2342261, 7005461509,  
7005631048

Article chhonzawmna...

Chhun dar 1:00 velah Khawnglung khaw hmun hlui kan thleng chho ta hlawl a, thing hmun ngawpui a lo ni tawh a, hah a dam sawng sawng thei. Pawiho rawn luhna nia an sawi pakhat, an khaw (hlui) chhak lam kan fang thuk thuk a, kham chhengchia hlir a nih avângin mihring han kai theihna chi-ah kan ruat lo va, Zawng erawh kan hmu nual thung.

Khaw hlui hmun kan fan hnu hian kan riahna hmun tur, 'tlang sang' an tih mai panin kan kal leh ta a, tluang takin tlai dar 3:00 velah kan thleng a, dan pangngaiin kan riahna tur puan in kan kaih hnuin eirawng kan bawl a, dal chhum leh nutrela bawl bakah chi mai chauh kan chawhmeh a ni nachungin tlan tla hluamin kan ei tho mai.

**A zan hnihna chu** - A tûk zingah tukthuan eikhamin Râwpui panin kan kal leh a, "Khawlung khaw lut turin Lungdai pal tlang ngei ngei a ngai," an tihna hmun chu a khaw chhuahsan zawngin kan pal tlang a, chhuk zawng hlira kan kal hnuah Khawnglung Gate kan thleng ta hlawl a, Gate duty te'n thingpui te min lo lum a, kan in zawh hnuah Râwpui panin kan kal leh ta hnak hnak a.